

աւետարանի մէջն է կամ Մողնու աւետարանի և Հաւուց Թառի Ամենափրկչի, որոնք այդ կողմից նման են իրար և կողմակի կերպով հաստատում են մեր կարծիքը վերջինիս ծագման խնդրի նկատմամբ: Սաչից իջեցնելու պատկերի մէջ ևս Յիսուս կանգ-

նած է ուղիղ գետնի վերայ. Նիկոզիմոս թէև գրկել է Յիսուսին ճիշդ այնպէս, ինչպէս Հաւուց Թառի Ամենափրկչի կամ Սանդալի աւետարանի մէջ, բայց առանց սանդուղի վերայ բարձրանալու:



Պատկեր 33

Աւետարան Սմբատ Գունդասապլի. մանրանկարիչ Աւետիք.

Մողնու աւետարանն էլ մեր այս երկու ձեռագիրներից քիչ յետոյ միայն կարող է ծագած լինել. Մարիամ և Յովհաննէս իրենց կեցուածքով, ձեռքերի դիրքով, մասամբ եւ գէմքի արտայայտութեամբ նման են Սանդալի աւետարանին. բայց Յիսուսի իրանն աւելի է թեքուած դէպի աջ, արիւնն էլ աւելի ուժեղ հոսանքով դուրս ցայտում խոցուած կողից. իսկ Ղուկիանոսը զլուսն այնպէս է բարձրացրել, որ արիւնը աչքի մէջ ցայտել կարողանար: Յիսուսի մարմնի դիրքը, արեան հոսման ձևը, գուցէ և հրեշտակների անդրիններ, մնացորդներից դատելով՝ աւելի մօտ են Իսաիայի որմանկար խաչելութեան, որ ԺԱ. դարի գործ է⁽¹⁾: Մարիամի և Յովհաննու կեցուածքը և հրեշտակները մանրամասներով Սալերնոյի Պալիտտոյի բուն խաչելութեան առանց ներքեի տեսարանների, ըստ ոմանց ԺԲ. դարի, իսկ ըստ Կրաուզի ԺԱ. դարի գործ, բիւզանդական եւ տեղական լատինական ազդեցութեամբ⁽²⁾:

Մողնու աւետարանը համարում ենք ԺԱ. դարի վերջերի, ոչ ուշ քան ԺԲ. դարի գործ:

ԺԳ.

ԺԳ. դարի Ամենափրկչի խաչաբանների պատկերագրութիւնը բոլորովին նոյն է, բայց շատ նմանութիւններ ունի նախընթաց պրակում նկարագրած խաչելութեան և խաչից իջեցնելու մանրանկարների և մասամբ Հաւուց Թառի Ամենափրկչի հետ. ուրիշ խօսքով մեր քննութեան նիւթ եղած մտախնդրի զարգացման երրորդ օղակն է Հաւուց Թառի Ամենափրկչից սկսած: Տարաբաղգարար ԺԱ. և ԺԲ. դարերից նկարա-

զարդ ձեռագիրներ քիչ են հասել մեր ձեռքը, հասածներն էլ պակասաւոր վիճակի մէջ. Գազիկ Բագրատունի Կարսեցու աւետարանը զրկուած է իւր շատ նկարներից⁽³⁾. մի բարբարոս ձեռք կտրել, հանել է պատկերների մեծագոյն մասը, բնագրից դատե-

(1) Diehl. 465. 435:
(2) Gesch. der Christ. Kunst. II. 41 (պատկ. 20):
(3) Ձեռագիրը պահւում է Երուսաղէմի Հայոց մասնադարանում՝ N 2556|1: